

十民國十年歲除出版

東

游

鴻

瓜

鏗



山西大同縣署鉛

東游鴻爪錄目次

- 緣起 首途盛況 中島裁之君之勉言 嚴督辦之考詢 過大沽口
- 烟台與成山角之遠景 吳淞夜泊 租界繁華 賀視學之勸言 愚園紀勝
- 潘師葛之行蹤 自滬到東之旅遇 日兵嘲罵 聚精館旅居 寄政俗擷要
- 兩班修業之經過 日教師之諷語 新舊相軋 欺人太甚 以華辱華
- 何大根之奇遇 鈴木米次郎之演說 日本之新發明家 無線電話之發明
- 參觀筆記 小學校衛生要項 日本現今之教育界附表 風俗雜誌 萬里長城談
- 宏文學院運動會 理化師範兩班畢業式附畢業名單 日比谷公園 上野動物園
- 小石川區植物園 淺草水族館 游就館 大觀艦式 電車之利便
- 車夫下女有教育 德國教育家 抵制取締規則附陳天華絕命書 新思潮之出版品
- 宏文學院誌畧 留學期內大事記 終結

自序

東游鴻爪錄爲光緒三十一年間之見聞零碎撥拾而筆之於書也
雙丸如擲一枕乍醒人事怱怱距今已十六星霜矣迴憶過渡期間滄
桑移易陵谷變遷政體由帝制而立憲而共和教育由注入而啟發而
自動新潮激盪浩無津涯誠有爲人思議夢想所不能及者語云以前
種種譬如昨日死以後種種譬如今日生執此以衡則十數年前之事
實已成陳迹何故於爛帛堆中求生活耶卽有一二切中時弊之語芻
蕘一得已爲不適時之藥劑更何補現今最複雜之社會耶是不然理
論者事實之母過去者未來之鏡人生不過數十寒暑耳縮短時間亦
朝菌不知晦朔蟪蛄不知春秋此小年也一日不死卽有一日之云爲
動作前所經過種種事蹟旣日計不足而月計有餘月計不足而歲計
有餘陳陳相因以至今日不妨取備瀏覽以觸個人之反省也尼父有
十五志學三十而立四十不惑五十知命六十耳順七十從心不踰矩
之述言子輿氏曰我四十不動心蘧伯玉年五十而知四十九年之非

凡此非自省而能自覺乎吾輩讀聖賢書所學何事既飄飄然遠涉重洋艱難險阻備嘗之矣一國之政教風俗有所記載秘而不宣已負初衷况東鄰窺伺有國恥在可不卽果證因一探其底蘊耶因檢舊稿付之鉛蕪非必謀公諸同好但期自省而自覺權作吾之記事珠近思錄可也時中華民國十年歲除識於雲中公廡

序一

負笈遠游入蓬萊三島但見山水秀絕花草繽紛不覺心曠神怡撲去俗塵數斗及進而考察其政教風俗無人不學舉國皆兵明治維新不過三十餘年而國力之強與歐美先進國並駕齊驅位躋一等嗚呼可謂盛矣濯足扶桑何修到此非千載一時之遇乎不有佳作何伸雅懷吾鄉鼎公其先吾著鞭者與余爲東游附驥之一人與鼎公居同地學同校去同時凡所以居東者飲食起居無不同余則未能免俗聊復爾爾而大手筆如鼎公獨留心時事零紈碎錦筆之於書洋洋成一鉅觀自署曰東游鴻爪錄取而讀之余心滋愧矣是余不及鼎公遠矣幸有

斯錄記鼎公之鴻爪猶記余之鴻爪也噫亦足以豪矣赤城紫登程瀛序於大同縣署時中華民國十年末日

序二

三十節日至雲中學生對於太平洋會議魯案游行講演表示否認日人直接交涉之決心此時余不知留東者眷懷祖國之情若何與日人對付我國之策若何只悶悶兀坐而已幸馮公駐節平城出東游鴻爪錄見示製序展卷豁然得日人之情僞及東瀛風土習慣與教育實業狀況迺知日本之強強於實學向之留學徒襲皮毛無實用甚不強人何怪笑我五分鐘熱度也耶今公居東瀛爪攫日人之腦髓吸取瀛洲之精脈灌輸我五族喚醒我同胞有功祖國偉矣若游洋盡如公交涉不患無才矣區區二十一條積久未決之案必能斡旋諸大國爲之公決絕不任其直接從事蓋已能自強人始扶持之否則雖呼人提携無應也自強則我有所備而人不敢輕故曰知此知彼百戰百勝公之紀東採輿情別國情暨現在學戰商戰藝術戰之種種而得寸則寸得尺

則尺唯一餉遺祖國爲交鄰之準備此其遊歷經驗之學程高居何等耶每見外人來遊華土凡國內山脈水系土產金鐵煤礦等等詳紀歸國發印轉售我國以爲居奇又在省署見日人繪山西圖數十冊雖關隘河渠村莊道里無不備舉未稔我國學子於游歷能測繪者有幾能筆記其所歷之地之風土人情教育實業狀況者有幾噫如公東游鴻爪錄亦不多觀矣公自國門長驅東都得亞東形勝沿途記載及居東學程備載無遺總列成冊刊行中外俾人洞悉口情勉勵留學者有東西洋劄記之例當必以此爲嚆矢也乎是爲序大同子溫厲時中

東游鴻爪錄

上谷馮延鑄

緣起

夙負東游之志也久矣然家况累身不能如願相償而作海上釣齋客適昨歲設帳郡齋十月之交省視學
棗強賀培桐先生湘南其字也亦下榻署中往謁數次談甚洽慨宜地風氣之不開學界終無進步遂倡派
人游學東瀛之舉商於郡守王敬輿太尊頗樂爲之以無款可籌無人願往爲慮不敢決定此事之成否願
而問余曰我捐廉派送有人願去乎應之曰有太尊有此熱誠自隗始不敢貧濯足扶桑固所願也賀視學
欣然色喜並有吳瑾侯先生在座亦贊成至今春正月間王太尊同賀視學妥訂辦法卽札訪所屬各州縣
或官費或公費每處只少派送一名務選品學兼修之士赴東留學一年入直隸理化專修科畢業回國後
各在本地盡義務五年以造就蒙學教員爲將來任務每年薪金以二百爲度示限制也其札文云本府捐
送一名宣化縣謝令愷張家口鹽釐同王君乃節各捐送一名餘則各就本地情形龍派送否速爲申覆此
時余承府尊並縣尊之命赴城東段家堡查學旋謁太尊報告辦學情形畢卽以派人東游事問遂於是日
定局焉時乙未二月十二日也後因西甯劉君壽昌本縣郭君效宗願游歷改爲太尊之派往余遂爲謝叔
璠大令資送者越數日各州縣派送並自備願往者相繼而來賀視學自龍赤返旆定於四月初六日束裝
起程計同行者官費生程紫登楊樂顏馬立安席朗霄高介臣馬子藩高仲三呂竹塘趙如九等自費生賈
捷卿王玉臣李聘卿童效先全翼之等游歷員康敬三王聘之等并九歲學童趙慶民一人共三十八名不
可謂非極一時之盛也

首途盛况

初六日早八點從家起身到中學聚齊王府尊謝縣尊率保甲勇排列隊伍金鼓齊鳴全城震動王松年局

東游鴻爪錄

長暨郡中紳董以及中小蒙養各學堂學生教員皆往送於南關之八蜡廟前衣冠楚楚氣度翩翩觀者如蟻亦居庸塞北破天荒之盛舉也送別者東向而立登程者西向而立臨別贈言王府尊云到東後可講求實學諸處皆宜注意以勿染習氣爲要謝縣尊云存忠君愛國之心行絜矩忠恕之道用修身克己之功中學鄧教員明初述孔子之言以爲贈云居處恭執事敬與人忠賀視學云諸生此行當以前言爲銘佩尤要者以求學爲第一要義官費係百姓之脂膏自費乃父老之血汗萬不可輕擲一無所得寶山空歸貽無顏返江東之誚言畢掛別如儀乘車而去本日宿新保安城次日宿懷來縣三日住南口四日抵鄴分投旅店

中島裁之君之勉言

初十日京寓陰雨連縣悶坐無聊同席君朗霄以楊松如孫楚澧兩君介紹到順治門外東文學社謁中島裁之君晤談甚久以思義勇三字勉之又屬到東後諸處宜謹慎財物可密藏之說文明國文明賊最多也二君赴東蓋皆肄業速成隨給信二致東京弘文學校校長嘉納治五郎一致高等師範教習松枝賢哲一

嚴督辦之考詢

十三日在津賀視學率學生等同乘人力車到經司胡同直隸學務處謁嚴範孫督辦現會天津凌雲臺太守候片刻督辦出焉因屋小人多分兩班接見余列第一班行禮後命同人皆坐一一詢之間曾否住過學堂到東擬習何科衆皆應問而答每一人答畢督辦即親筆於紙本可見對於學務實心實政不憚煩勞宜其聲名藉甚爲當今有數之大教育家也

過大沽口

買票乘安平輪船於十六日早十點抵塘沽停泊裝煤兩岸間帆檣林立喚渡聲斷續不絕行少許抵大沽凭欄四望岸塢奇絕烟水蒼茫誠直隸咽喉之地古人所謂天險是也所可惜者礮臺數座淪廢爲墟迴憶

庚子和約經各國要求一律削平何謀國者之失計乃爾詎吾國之果無海軍耶令人浩歎過此以往浩無津涯茫茫水國矣隨問風起船搖人心爲之不安同人中有作嘔者有暈眩者余獨無恙亦一幸

煙台與成山角之遠景

十七日日出時四望無際忽見煙臺約距數十里爲一絕大商埠人烟稠密貨物充牣概可想已又見有小帆數葉鼓盪中流烟波釣徒款乃一聲山水綠信足娛也正午抵成山角距數里縹渺間見洋樓二聳立層巒高與雲竝縱不識營造者爲何許人當亦非吾國之主人翁之自建也此處之水分黃綠二界各不相混如化學上化合物之分解然奇甚怪甚晚過黑水洋波平風靜咸慶安瀾不似昨夜之險象矣

吳淞夜泊

十八日船頭遠眺紅日一輪從東海湧出賦雲山蒼蒼江水泱泱之句不禁望洋興歎矣午後船主收票黃昏時見有小山數點羅列目前詢之舟人曰此茶山也上有燈光明星熒熒然夜停泊吳淞十九日早入口但見烟樹蒼茫波濤浩淼有日本之兵艦數艘停岸口行少許但見塢岸間停船最多大小長短無奇不有舸艦迷津不僅青雀黃龍之牖八點時抵上洋在黃浦灘下船寓二洋涇橋長發棧

租界繁華

上洋旅居數日無所事事每携二三知己徘徊租界間熱鬧異常以四馬路爲最足跡所經眼簾所觸無非青蓮閣天下第一樓天樂窩諸標幟光怪陸離春申江上風俗淫靡可見一斑矣及散步於上海城內陳腐狀況較租界判若天淵因憶我國一片乾淨土爲外人所伸定以租界爲名久假不歸恣意橫行據爲己有有強權而無公理已非一朝一夕之故所可恨者愚賤無知甘作外人奴隸恬不爲怪御馬車之華人其衣帽紅黃藍綠無色不備往來如織自以爲得意洋洋虎威狐假每於街市間欺陵良善罪大惡極自侮人侮

此之謂也至租界數十里中洋樓上之窗鏡如明星洋橋畔之春樹如綠雲洋人乘馬車而過如風馳電掣流連風景鞞擊肩摩慨念山河情傷目慘雖曰開眼實則痛心人孰無情孰能遣此言念之間不覺愴然涕下矣

賀視學之勸言

二十四日行李恩恩船票購妥已備上船東渡不料在日俄戰爭期間日船因俄艦東來不敢冒險前進已將船費繳回並聞有瀋口戰事之說二十五日特到時報館探訪消息悉日俄對馬島之戰並悉有俄從口外進兵假道蒙古直抵京師爲瓜分中國之見端同人紛紛議論莫衷一是欲東渡而不能欲西歸而不得久留滬上終非長策人心驚懼皆以俄由陸路進兵我宜適當其衝凡關心桑梓者未有不以此爲慮也二十六日賀視學知同人心若懸旌皆有歸意集衆婉勸且言迢迢遠來當以到東爲達到目的早定宗旨留學東瀛上策也東渡路梗假館滬上中策也無志東游掃興而返斯爲下策此日勝俄敗以三策爲定謀設日敗俄勝留學滬上上策也迅速回里中策也冒險赴東斯爲下策聞者無不歎服

愚園紀勝

二十七日午後天氣清朗以賀視學之約往愚園游覽乘馬車行馬路先到張園此中風景佳甚依然一小桃源也繼而經滄州別墅過矮廬轍跡所至烟樹迷離風景秀雅忽於花村柳陌中見高樓大廈高與雲齊巍巍然若天台山近視之即愚園也遂相偕而入見虎見猿見雛小山怪石奇花異草無所不見循曲徑履短橋繞迴廊登高閣憑欄四望奇雅秀麗氣象萬千別有天地非人間矣惟天機活潑之地俗塵未能盡絕歌舞座之當前男女合演寫真場之在側雅俗偕臨納涼者攜妓而來玩景者迎賓以至雖爲滬上之繁華實負名園之勝景爲可惜耳余風塵中人也未能免俗聊復爾爾小住爲佳亦行樂銷愁之一助不禁

賦樓閣玲瓏五雲起其中綽約多仙子之句

潘師葛之行蹤

滬上同寓有潘君名師葛者計三人時相過從言語不通以毛錐子作介紹人此公深目長鬚談笑間有大志詢其行踪言來自粵地往長崎探訪兄弟生理者數日後吐真情言越南亡人寄籍廣東在劉淵亭軍門幕下垂二十餘年軍門仙逝擬往東瀛留學並以提醒越南文見示落落萬言慷慨悲歌愛國之心溢於言表筆墨亦超脫不凡後以詩示之最佳者爲輿短幾無花可愛愁長偏有劍能醫兩句讀之令人叫絕

自滬到東之旅遇

端陽日到虹口上鎮安輪船三等艙僅堪容膝人數衆多甚形擁擠一如楚囚舟中人同行者有楚蜀兩省留學生數十名胡經武爲革命中之最少年亦在其列斯日龍舟競渡海涯游客圍觀如堵亦北人向未曾見之奇遇也午一點開船三點抵吳淞口兩岸間壁壘森嚴旌旗焜耀詢之舟人曰中國之水師沿路見兵輪數艘黃昏後燈光閃灼迎面而來皆兵艦也日俄戰爭尙未終局海面戒嚴危險哉我輩之東渡初六日午後船主查出茶房私帶之貨物并毆其人所有私貨如紹酒類均已付之東流晚遇臺北同教人達雲峯以名片示名屬鞠談詢行止據云到長崎而轉旅順此翁年五十餘日本裝式先爲吾國武弁自割台灣後而隸日籍者家現寓於上海虹口

初七日早見有島嶼羅列北九州南鹿兒其上則礮台矗立樹木葱蘢天然風景固可以豁人心目而兵事險要尤足記載也因憶元人攻日時以十萬師不能上陸而淪沒於海所謂一夫當關萬人難敵者斯地有焉午後經醫驗病後抵長崎停泊沿途中峯巒環繞樓閣參差昔人所謂入蓬萊仙境者吾輩幸福當不在徐驅下矣黃昏開輪直入長崎島

初八日早經日醫驗病後抵馬關停泊是日烟雨迷離山巒隱現古詩云山色空濛雨亦奇信然夜入日本海洪濤巨浪令人生駭

初九日午後二點到神戶港口由日醫驗病後行見兩岸間停立兵輪百餘艘完破不一此輪是甲午一役奪自我國海軍而來者可恥孰甚令人扼腕並見有造船塢數所集工完葺甚壯觀瞻三點後登岸經海關驗貨後寓田中儀助旅館該館異常清淨款待殷勤待女亦聰穎識字且有能操華語者其文化概可見已非我國之客棧喧囂難脫俗塵比矣晚十點登赴東京之火車

初十日午後五時抵新橋下車是日由神戶至東京經三十一站黑洞十二到東後同鄉宗植庭賈洞元呂劍秋諸君先我來者招待於站因寓神田區旭樓旅館

日兵嘲罵

從神戶到東京途中某站來往火車相迎而行彼方車上滿載征俄之日軍突見我輩東渡學子至數十名之多衣服奇異不中不西有指而罵者有望而笑者罵我國人不知愧死蓋以彼輩以血肉之軀爲中國爭地日從事槍林彈雨中死傷甚衆我等有何面目到彼國來求學乎笑我等異言異服有洋裝有華裝有半洋半華之裝怪狀百出不見精神且有寬袍大袖髮辮長拖者淹淹無生氣爲東方病夫國之代表一罵一笑撫心自問皆予以難堪此事爲我國所親見此語爲賀視學所譯述亦國恥之一也嗟嗟同胞盍興乎來果能自強不難決東海之波而洒之矣

聚精館旅居

東京旅寓由直隸同鄉會幹事部如李伯芝陸亮臣邢贊廷籍亮儕胡海門輩無不招待周至與同人介紹學校學師範者送入宏文學院學普通者送入同文書院間有人警監學校體育會音樂傳習所爲速成科

之捷徑均已安置妥貼余謁駐日楊星使馬拱辰參贊後隨到宏文學院報名並謁嘉納校長交納學費領得聽講券一枚購置湖北師範班講義全部係本校第一班湘人范靜生等所編輯者宏文在牛込區距神田區甚遠上課不便因有移寓之舉以延慶季雲章之引導冒雨尋房携子登朗霄立安聘卿等移於小石川區諏訪町十七番地聚精館小樓上每人房飯洋月日幣十二元生活程度之高可見已距校仍二里許

寄政俗擷要

乘長風破萬里浪安然入蓬萊三島矣居是邦也而政教風俗不可不注意焉爰擬一一撥拾筆之於書以餉吾梓鄉父老適得湘鄉蕭子鴻鈞纂輯日本政治擷要一書擇精語詳先獲我心之所同該書內容一地面人口二種族三宗教四政治機關五教育之普及六女學之發達七尙武之精神八財政九商工農業十交通便利十一建設之多十二風俗人心之美十三監獄法之善十四外交不失主權碎錦零統無不價貴金石滿腔熱血一以真樸篤摯出之毫無過激之談雲南太和六十有三歲之留學生周霞序文洵蕭子之知音哉因託印斯書三百册分寄鄉人以備展覽而作臥游似於開通民智不無小補也

兩班修業之經過

直隸理化專修科係應一時之需要爲留東同人所組織曾受直隸學務處之委託而成立者吾輩學速成師範原擬同人斯科因學額已滿不能多容經深州李紫洲介紹到宏文學院第三理化班係夜課每日自午六時至九時一年畢業所習科目爲物理化學算術代數幾何五種物理教員正木直太郎化學教員松永新之助數學教員東野十次郎皆有名之教育家通譯員江蘇伍崇學字仲文上洋諸翔字青來亦吾國之名士本班學生六十餘名以四川湖南兩省人爲最多余入校無幾時夜課聽講而外終日無所事事雖藉以研究學科考察教育然終覺遠出重洋非勤苦求學不能取得尺則尺得寸則寸之效適貴州師範班

始業設於宏文分校即大塚町亦以一年爲畢業期距理化班相差不過三月餘耳因約馬立安程紫登高介臣等同赴分校報名屆期上課該分校距旅寓約三里餘自此以後晝則大塚町夜則牛込區日無暇晷埋首於課程中更不覺其爲苦矣貴州師範班所修科目分三學期第一學期教育心理倫理日文算術幾何物理化學植物地理歷史生理及衛生圖畫體操等科第二學期教育教授法管理法教育制度倫理心理論理代數物理化學動物植物生理及衛生等科第三學期教育教授法教育行政教育史倫理代數物理化學動物礦物法制及經濟等科第一第二兩學期每週授業時數三十四惟第三學期每週二十八小時有實地研究及學校參觀占時間八該班教員甚多迭有更換通譯亦不一人最優者爲倫理教員高島平三郎法制經濟之譯員吾直張繼字博泉二人至學員中之翹楚則推貴州周恭壽字銘久慮德璠字小香同鄉趙澍潤字德普胡家蘭字香圃且與余爲契友時結文字緣異域訂交亦一快事

日教師之諷語

直隸由各縣選派游歷紳士第一期在宏文學院開教育選科課程簡單期限短促當開學之第一日教員波多野登壇演說譏刺語最多據本班友人述之云有中國善於通商日人善於愛國兩語窺其意旨通商云者譏華人到東游學者藉留學之名受注人的教育不啻販貨而來將必飽載以去返國得一差使可獲厚利第一二期之師範生其先例也

新舊相軋

直隸游歷紳士第一期教育選科設於宏文分校每上班時多有異裝者形式既不整齊馬齒加長又居多數本校學生不知何許人也日者書於選科講室黑板上曰頑固野蠻紳董現像某紳見而怒亦大書特書曰革命排滿學生義務此可見吾國民族之程度也貽笑外人亦因其所

欺人太甚

直隸第一期選科半皆老紳中有一最頑固者衣洋服而髮辮外露同學者多勸戒之蓋謂進人之學校當以守人之學制爲是此髮辮不必盡行剪去卽收拾整齊盤繞腦頂亦無不可乃彼執迷不悟旁若無人更不解辱國之謂何他日有同班者大書於黑板上曰豚尾宜去仍纍纍自若也越數日某教師講功課畫一有尾之鼠畫一無尾之鼠以有尾諷學生中之帶辮者以無尾嘲學生中之剪髮者又七月初二日第三理化班因前數日間在講堂授業時而樓板下墜人皆避去經教師令移別室俟修葺畢又復移於本講堂於是日晚正聽講間忽聞樓板上作聲一時學者又紛如鳥獸散恐如前次之危險不料是樓上人戲弄使然也本院舍監姓土肥者因室內秩序大亂輒謂吾國人膽小如鼠笑而書於黑板上曰風聲鶴唳又日本人之體育會頗有尙武精神我國人多願入之吾鄉張鏡亭亦在其列暑假內未授課而先習日語同學自肆屢與教師爲難教師某授課時直云驢馬披的獅子皮甚爲得意諷華人衣洋裝也總之我國人之自治上多疏懈以致外國人之對待常以下等動物目之我輩甘受辱而莫可誰何嗟我華人忍聞此而不思所以報之乎欲籌報之之策當堅忍刻苦勵學以強國此心不可懈此恥終可雪

以華辱盛

七月初七日神田橋日語學校其中肄業者有我鄉賈捷卿童效先等數人並他省人十數先是日校員給各學生入場券一云某日本堂有活動大寫真特爲清國留學生設並請有通譯看此舉動甚文明且極周到故臨時入覽者華人集二百餘不料寫真之戲法只演一二場中止圖窮七見而吾國之醜態露矣玩戲法者華人二亦無一物一語不傷貶中國不詆毀華人斯時觀者頗爲不平大有羣起而攻之勢竊念同在異國恐犯法權皆噤若寒蟬敢怒而不敢言初見只要盤弄碗之小技繼而弄出華女纏足之弓鞋至是譁

然激動公憤恨不暇彼玩戲法者食其肉而寢其皮以有日人護之不得逞遂大罵而去越日到會館聚議見榜公使請求辦交涉許爲驅逐回國不令在此逗留有傷國體該校學生並龍驤學生皆因此而退學焉按此事以華俗之曲技玩弄我華人亦屬小節竟以我國最野蠻之物藉以羞辱之誠可大爲痛恨也即欲與之力爭與之理辯其如吾國之弱何噫莘莘留學生也既知日人慣於侮辱我華人即有絕巧美術當概置之不見爲是也何既看之而後恨之也尤矣哉自悔然後人侮自辱然後人辱也

何天根之奇遇

何天根字廷楡山海關內永平府人也年十四時直隸遭拳匪亂後各國與問罪之師近畿一帶塗炭慘禍不堪言狀日兵搜拳匪之餘孽磨集山海關附近地方斯時人民聞之皆驚悚各攜家室以遠逃何君父母亦去而之他日者日兵蜂至何君與窗友某同在書館坐獨不肯避閉門而待忽聞日兵來扣門二人立藏於爐坑內以避之日兵入室搜得逼令二人回到東洋窗友某不肯被日兵用槍嚇死何君見幾而作即隨日兵以去日將山本君見而異之遂帶回國撫養如已于送伊入學校肄業一二年餘適日本大將有公幹到朝鮮遂將伊轉囑少將某氏撫養焉至日俄之役少將某氏出征又轉寄伊於某友家不料山本氏死某少將繼之亦不幸之甚也適遇少將某友亦甚奇之每許伊回華籍何君義不忘舊自聞山本死每念一飯之恩千金難報遂慷慨刻髮以作酬謝當其在日人之家時每於日人外出而一人默默操華語以爲練習恐日久而忘之於此可見有不忘祖國之意日人欲以女妻之而不肯娶恐戀妻而不能歸國使英雄壯志半銷沉於婦女手中足見有恢復中原之思想落落氣概誠不凡矣何君屢欲歸華惜無人介紹又恐負恩養之意今春三月間已在尋常師範畢業年始十九矣何君在直隸同鄉會對衆自述其志節有足多者愛國男兒不當如是耶故筆記之以示欽佩

鈴木米次郎之演說

直隸省同鄉會事務所於十月初九日開音樂班延鈴木先生擔任講習嚴君智怡作通譯開幕日鈴木語諸生曰諸生留學東京今欲研究音樂一科乎音樂者不僅唱曲行樂爲種種快心之專也而要先練呼吸法一呼一吸間於人生有絕大之關係人在大氣中非呼吸不能生活而學音樂之呼吸練得於人身體上之健康可增進且於教育界中人養心性擴智識長精神快情感爲學校必不可少之一種要素諸生聽他人之作音樂時往往觸起興會欣喜羨慕以爲人生最快心之事一自己身學之常覺困難生不快感至於到極難之地步甚且厭倦畏難廢於半途而不欲爲然至此時愈困難到困難後進一境而有一境之趣味愈活潑愈暢快諸生欲研究此科可專心練習自有進步之一日也余亦列學員之一故聞其言而記述之

日本之新發明家

東洋之愛既遜其人爲誰曰日本之鈴木藤三郎是也氏爲製糖會社社長數十年來煞費苦心理論經驗備極鑽研其結果遂得發明一切製作馳譽全球其得本國政府所特許者約共三十種得歐美各國所特許者凡十四種茲將歐美所特許者分列如下

- | | | | |
|----|-------------|----|--------------|
| 一 | 重疊式無汽蒸發裝置 | 二 | 醬油愛起司製造裝置 |
| 三 | 冰砂糖製造裝置 | 四 | 回轉式無汽蒸發裝置 |
| 五 | 熱汽及汽發生裝置 | 六 | 直立式氣罐改良 |
| 七 | 直立氣罐節炭來置 | 八 | 管內掃除裝置 |
| 九 | 完全燃燒爐 | 十 | 多管內自動掃除裝置 |
| 十一 | 無氣罐蒸發罐裝置之改良 | 十二 | 水管式直立氣罐 |
| 十三 | 直立式汽罐 | 十四 | 重疊式無氣蒸發裝置之改良 |